

**Date – 25/06/2026**

**Time - 7:30 -7:40 Hrs**

**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

- 1. Vawiin hi India ram danpui, Constitution palzut ni champhaphak Samvidhaan Hatya Diwas a ni a, He ni hi kum 1975, June ni 25 a India ram sorkarin Emergency a puan hmanga India ram a tih chhiat hriatrengna atana tih a ni.
- 2. State Transport Authority chuan thla thar July ni 1 atanga hman tan tur Mizo Taxi App hnuaia inziaklutin mamawh a phuhru lo anih chuan PERMIT thar pek tum anih thu an sawi.
- 3. Arunachal Pradesh-a ruahsur nasa leh tuilian avangin hmun tam takah chhiatna a thleng
- 4. Prime Minister Narendra Modia hoin PRAGATI Meeting vawi 52 na chu nimin khan Seva Teerth ah neih a ni



**SAMVIDHAAN HATYA DIWAS**

Vawiin hi India ram danpui, Constitution palzut ni champhaphak Samvidhaan Hatya Diwas a ni a, He ni hi kum 1975, June ni 25 a India ram sorkarin Emergency a puan hmanga India ram a tih chhiat hriatrengna atana tih a ni.

Sorkar laipui ruahmanna in Samvidhan Hatya Diwas hi kum 1975, June ni 25 a India ram sorkarin Emergency a puan hmanga India ram a tih chhiat hriatrengna atana tih a ni a. Kum 1975 Emergency puan laia nunna chan leh mi tam tak tuarna hriatpuina niah hman a ni thin a ni.

*June ni 25, 1975-a Pi Indira Gandhi rorelna hnuaiah National Emergency puan hian khua leh tui te dikna chanvo Fundamental Rights tihtawp a ni a, he ni hi India danpui tihhlumna ni -Constitution Murder Day tih hiala sawi thin niin National Emergency puan hian ramchhung rorelnaa buaina a thlen a, a hunlaiin chanchibumite thlenga an dikna chanvo tihtawp niin khua leh tuite zawng zawng dikna chanvo tihtawp chu a nghawng lian ber a ni.*



DARZO

Adviser to CM, Pu TBC Lalvenchhungachuan a pisaah Bharat Forge leh Confederation of Indian Industries (CII) ten Darzo khuaa tuihna tihpunna tur project, Corporate Social Responsibility Fund atanga an thawh tur chu nimin khan a hawng.

Pu TBC Lalvenchhunga chuan, Darzo khuaa tuihna tihpunna (Ground Water Rejuvenation) project an rawn kalpui avangin Bharat Forge chungah lawmthu a sawi a. CSR Cell ten hma kan lak tirh ata vawiin thlengin Bharat Forge te hian min thawhpui tha hle tih a sawi a. Mizoram CSR tam zawk a hmuh theihna tura theihtawp chhuah rengtu CII Mizoram chungah pawh lawmthu sawiin, project hlawhtling tak an beisei dawn tih a sawi a ni.

He CSR Project hmang hian Darzo khaw ram hectare 1.93 a zauah ruahtui tlinna tur khur (trench) 1000 laih tur a ni a, hna hi Young Indian Mizoram ten an thawk ang a. Young Indian te hi Confederation of Indian Industry (CII) hnuaia thalai pawl an ni a. He project hi India rama Young Indian ten hetiang lam chi CSR Project an thawh hmasak ber tur a ni.



RD MINISTER

Rural Development Minister Prof Lalnilawma’n tui harsatnain zual lam a pan zel avangin boruak thianghlim leh sik leh sa mumal tak pe theitu thing phun uar a pawimawh thu a sawi.

Rural Development Minister Prof. Lalnilawma hovin DRDO Office Aizawl chuan nimin khan Green Mizoram 2026 pualin Sakawrhmutuai tlangah Thing phunin an hnatlang a, Thing tiak 20 lai an phun a ni.

Prof Lalnilawma chuan sik leh sa danglam zelah ruahtui tlak dan a mumal thei tawh lo a ti a, tui harsatnain zual lam a pan zel avangin boruak thianghlim leh sik leh sa mumal tak pe theitu thing phun uar a pawimawh thu sawiin thing phun piah lamah enkawl zui chu a pawimawh a ti a, nitin mamawh ei leh bar zawнна kawngah thing mamawh chang awm mahse a bak chu chu khawih loh leh humhalh bakah duat taka enkawl chu mitin mawhphurhna a nih thu a sawi a ni.



STA

State Transport Authority chuan thla thar July ni 1 atanga hman tan tur Mizo Taxi App hnuaia inziaklutin mamawh a phuhru lo anih chuan PERMIT thar pek tum anih thu an sawi.

State Transport Authority chuan nimin khan thuchhuah siamin July ni 1 atangin Mizo Taxi App chu an hmang tan dawn an ti a, 1<sup>st</sup> Phase hnuaiah permit pek phawt ni se an tih thu sawiin 2 Wheeler ah lirthei 300 leh 4 wheeler ah lirthei 200 pek ni se an ti a, Autorikshaw chu Aizawl khawpui chhunga hmun hrang hrangah 10 theuh pek ni se an ti a ni.

Aizawl khawpui tana awlsam zawka Online Booking System Mizo Taxi App chu July ni 1 atanga hman tan tur a ni a, tuna Aizawl Taxi leh Autorikshaw tlan mek te tan MizoTaxi hnuaia inziahlul theih hun chu June ni 30 ah a tawp dawn a ni.

State Transport Authority thuchhuah tarlan danin tun dinhmunah Mizo Taxi App hnuaia inziaklut lirthei 306 an awm tawh a, heng lirthei zingah hian two wheeler inziak lut tam berin lirthei 159 a awm a, 4 wheeler lirthei 143 awmin Autorikshaw 4 a awm bawk a ni.

STA chuan Mizo Taxi App hnuaiah man chawia mipui phur lirthei te inziak lut zel turin a sawm a, in ziaklut duh te tana remchan zawk nan sawrkar chawlh ah pawh inziah luh zel theih anih thu an sawi a ni.



**STATE FELICITATION OF KAYAKALP AWARDEES MIZORAM**

Health Minister Pi Lalrinpuii’n nimin khan State level Kayakalp Awardee-te chawimawina a hmanpui.

National Health Mission, Health & Family Welfare Department buatsaih State Felicitation Of Kayakalp Awardees Mizoram (2025-2026) chu BSI Hall, Bible House-ah hman a ni a. Khuallian Pi Lalrinpuii chuan, India ram pumah faina ngaih pawimawh a ni tih sawiin, Swatch Bharat campaign te pawh neih a ni thin a ti a. Kayakalp pawh Swatch Bharat initiative hnuaia mi niin, Kayakalp Scheme in a tum ber chu Cleanliness – Faina hi a nih thu a sawi bawk. Mizoram chhunga damdawi in hrang hrangte, Sub-Centre atanga PHC, District Hospital thlengin an faiin an thianghlim hle a. Thawktute inpekna, thawhhona tha avanga lo hlawhtling thei a ni a, a ropui hle a ni, a ti.

Kayakalp Award Scheme hi Ministry of Health and Family Welfare (MoHFW) bul tanna, Swachh Bharat Mission hnuaia hmalakna peng pakhat a ni a. Sorkar damdawi in leh clinic-ah faina, hriselna, bawlhhlawh sawngbawlina leh natna inkaichhawn laka himna kawnga hma la tha ber bertute chawimawina leh tan lak tharna tur atana buatsaih a ni.



**SPORTS MINISTER**

Sports Minister Pu Lalnghinglova Hmar chuan India Junior Women Hockey Team (U-21) ah Mizo tleirawl pathum an tel chu lawmawm atih thu a sawi.

Sports Minister hian social media kaltlangin he thu hi a sawi a, India Junior Women Hockey Team (U-21) a tel Mizo tleirawl pathum - Lalneihpuii, Denlung; F.Lalbiaksiami, Lunglei leh Lalrinpuii, Hnahthial - te chu thinlung takin a lawmpui thu sawiin tunhnaia hockey a hma an sawnna chuan a ti phur takzet a ti bawk.

India Junior Women Hockey Team (U-21) hian Scotland Senior Women tumin heng baakh hian U-21 huangah USA, England leh Belgium an tum dawn a, hei hi Junior Asia Cup an inbuatsaihna kal zel a ni.



12 YEARS OF NDA GOVT

Prime Minister Narendra Modi kaihhruai NDA sawrkar kaltlanga tanpuina dawngtu Tuipui South khuaa cheng ten an chhawr tangkai thu an sawi.

Hnahthial-a Akashvani Correspondent PC Lalhmangaihzuali’n Tuipui South-a cheng sawrkar laipui scheme chhawr tangkaitu hrang hrang a kawmna ah mipuiten an chhawr tangkai thu an sawi a, hamthatna hrang hrang an dawn chuan an khawsak a ti awlsam an ti a, chenna in neilo ten sawrkar kaltlangin chenna in an neih thu an sawi a, PM-Kisan kaltlangin loneituten tanpuina an dawng tih sawiin Ayushman Bharat hnuaia Golden Card nei ten an hman tangkai thu an sawi bawk.

Prime Minister Narendra Modi kaihhruai NDA sawrkar hian kumin hian a kum 12-na a tling a, hemi pual hian Akashvani News Aizawl chuan sawrkar laipui hmalakna hrang hrangah mithiamte a kawm a, hengte hi Akashvani News Aizawl youtube channel leh Social media hrang hrangah hmuh leh ngaihthlak theihin a awm a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



ARUNACHAL PRADESH FLOOD

Arunachal Pradesh-a ruahsur nasa leh tuilian avangin hmun tam takah chhiatna a thleng. Tuilian hian Posa-a NEEPCO Colony te, Keyi Panyor district-ah te chhiatna a thleng nasa zual a. Hriat theih chinah mi pali chin hriatlohin an bo a. Thuneitute chuan chhiatna thleng avanga thi zat hi an la puang Chiang thei lo thung a ni.

NEEPCO project hotute chuan an mi leh sa 17 in hliam an tuar tih sawiin an zinga pathum chu an dinhmun a tha lo hle a. Chief Minister Pema Khandu chuan ruahsur leh tuilian avanga chhiatna tawh chhungkua zawng zawngte a tawrhpu thu a sawi a. Chhiatna thlenna hmunte vil reng anih thu a tarlang bawh a ni.

Union Minister Kiren Rijiju pawhin mipuite fimkhur turin a chah a. Sawrkar chuan mipuite himna a ngai pawimawh ber tih sawiin sawrkarin invenna tura a a thuchhuahte lo ngaichang turin a chah a ni.

Arunachal Pradesh-a ruahsur nasa avang hian Assam sawrkar chuan hmun thenkhatah tuilian tuar mai thei dinhmun a din a avangin inralrinna a ti chhuak a. Arunachal Pradesh-ah ruah a sur nasat avangin lui tui a lian nasa hle a. Hei vang hian Assam-a district thenkhat Dhemal, Lakhimpur, Biswanath leh Sonitpur ah te tun atanga ni hnih thum chhungin tuilian thleng thei reng anih thu IMD chuan a sawi a. SDRF, NDRF leh emergency-a thawkhchhuak thei turte chu inralring tura tih an ni

a. Hmun hniam lai leh tuilen theihna hmuna chengte chu inralring tur leh sawrkar thurawnte ngaichang tura hrilh an ni bawk a ni.

<><><>

**PRAGATI**

Prime Minister Narendra Modia hoin PRAGATI Meeting vawi 52 na chu nimin khan Seva Teerth ah neih a ni a. PRAGATI hi sawrkarin hna a thawh hrang hrangte chak tak leh a hun diktaka zawhfel anih theihna tur ICT kaltlanga ngaihtuahtu committee a ni a. He hunah hian ramchhunga state pali huamchhunga hmasawwna ruhrel hna thawh hrang hrang kawngpui, kawlpheha, Industrial Corridor leh Metro Rail sector amite hnathawh dan thlirho a ni a. Heng project atan hian cheng vaibelchhe sing thum chuang ruahman a ni. Heng project eibar zawwna kawnga hmasawwnate, inkalpawhnate, industry hmasawwna leh mipui hamthatna turte a hun taka zawh anih theih nan thlirho a ni a. Prime Minister Narendra Modia chuan hmasawwna project te tikhawtlai chuan sum sen a ti tam tih sawin mipuite tan leh industry te tan an hamthatna tur tam tak a tibo a ti a. A kaihhnawih Union Ministry leh state sawrkarte chu uluk taka vil thin turin a chah a ni.

<><><>

**FIFA WC**

FIFA World Cup 2026 khelk mekah nizan atang khan Group Match hnukung ber khelk tan a ni a. Group B inkhelah Switzerland chuan a thlengtu Canada chu goal hnih goal khatin an hneh a. Group B ah vek hian Bosnia and Herzegovina chuan goal thum goal khatin Qatar an hneh bawk a. Group B atang hian Switzerland leh Canada te hian Second round an lut chiang tawh a. Hetihlai hian Group C inkhelah Brazil chuan goal thum faiin Scotland an hneh a. Morocco-in goal 4 goal 2 in Haiti an hneh ve bawk a. Group C ah hian Brazil elh Morocco ten second round an lut a ni. Group A atangin South Africa leh South Korea te an inkhel mek a. A thlengtu Mexico leh Czechia te an inkhel mek bawk a ni.

<><><>